

Sejarah dan kebudayaan Labuan perlu dipelihara dan dijaga

NST 17.5.17 4
LABUAN: Timbalan Naib Canselor (Hal Ehwal Pelajar dan Alumni), Universiti Malaysia Sabah (UMS), Prof Madya Dr Ismail Ali menasihatkan golongan muda supaya menjaga sejarah dan budaya masyarakat tempatan khususnya Wilayah Persekutuan Labuan.

Katanya, semua pihak termasuk agensi kerajaan, swasta, badan bukan kerajaan (NGO), institusi pengajian tinggi (IPT) dan orang perseorangan perlu berganding bahu memainkan peranan masing-masing memartabatkan warisan sejarah dan budaya setempat.

"Tanpa adanya kesedaran terhadap sejarah dan rasa bangga terhadap kebudayaan ibarat sebatang pokok hidup tetapi tidak berdaun dan tidak berbuah," katanya.

Beliau berkata demikian ketika menyampaikan ceramah pada program Bicara Tokoh Sejarah Labuan di Anjung Budaya, Perbadanan Labuan, Kampung Layang-Layanan, Sabtu lalu.

Turut hadir Pemangku

Pengarah Muzium Labuan, Muhamad Nazli Ho Abdullah dan Pengarah Jabatan Pelancongan Perbadanan Labuan, Mahathir Abd Hamid.

Hadir sama pemimpin NGO dan kira-kira 100 peserta yang terdiri daripada pelajar sekolah menengah dan IPT di Wilayah Persekutuan Labuan.

Dr Ismail berkata usaha Ahli Parlimen Labuan, Datuk Rozman Dtuk Isli yang sentiasa berusaha mengangkat semula warisan budaya etnik di Labuan tidak akan berjaya sekiranya tiada komitmen daripada penduduk Labuan sendiri.

Beliau turut mencadangkan kepada Muzium Labuan dan Perbadanan Labuan supaya mempromosikan semula kebudayaan dalam bentuk makanan tradisi versi Labuan seperti kuih kelupis, lamban, ketupat, kuih wajit, kuih bahu-lu, kuih sapit, cencaluk dan tumpi ketika penganjuran pelbagai program.

Selain itu, menganjurkan Pesta Bubuk dengan menampilkan perkakas yang digu-

nakan dan penghasilan produk berasaskan bubuk seperti belacan, cencaluk dan patis.

"Kita patut membina monumen Jangkar sebagai mercu tanda pensejarahan Labuan. Banyakkan juga penerbitan buku mengenai sejarah, budaya tempatan termasuk mengenai ahli sukan yang pernah mengharumkan nama negara seperti Datuk Hassan Sani," katanya.

Sementara itu, Muhamad Nazli berkata masyarakat perlu menghargai usaha dan peranan yang dipelopori Jabatan Muzium Malaysia dalam elemen pendokumentasian dan kajian ilmiah yang bermutu sebagai cabang pendidikan untuk tatapan generasi akan datang.

Beliau berharap menerusi penganjuran program Bicara @ Muzium itu mampu memberikan kesedaran sosial kepada masyarakat dan pelajar supaya dapat menanamkan semangat perpaduan, permufakatan dan berinteraksi agar dapat menyelami realiti sejarah dan kebudayaan. -
OLEH JAINUDIN DJIMIN



Dr ISMAIL (lima kanan) bersama kakitangan Muzium Labuan.



PESERTA ... Dr Ismail (tengah) bersama peserta program Bicara @ Muzium di Anjung Budaya, pada Sabtu.